

Eros Cisilino al è il gnûf president de ARLeF

“O pontarìn une vore sui zovins par dâi un avignî ae nestre lenghe”

Eros Cisilino, 43 agns, al è il gnûf president de ARLeF (Agjenzie Regionâl pe Lenghe Furlane). Impleât cumò intun dai consorzi di bonifiche regionâls, Cisilino al è stât conseîr provincial dal 2013 al 2018 e prime vicesindic e assessôr dal Comun di Merêt di Tombe. Za president dal 2001 al 2005 di une associazion culturâl ricognossude de Regjon Friûl-Vignesie Julie pe valorizazion e pe tutele de lenghe furlane, al è stât ancje coordenadôr editoriâl e autôr di publicazions par furlan e par talian. I vin fat cualchi domande par cognossi miôr lui e il so pont di viste su la lenghe furlane.

Cemût aial cjapât l'anunzi de nomine?

O ai di dî, in dute francjece, che e je stade une nomine inspietade ma che o ai acetât cun plasé e riflessività. O ai acetade la incarhe cun sens di rispet pal rûl che la Agjenzie regionâl e à intal panorama culturâl dal teritori, e ancje cuntune fuarte responsabilitât, viodût il moment storic particolâr che lis lenghis minoritariis a son daûr a vivi.

In merit a chest, cemût valutial il stât di salût de lenghe furlane?

Cuasi dut il secul XX al è stât caraterizât di politichis che a ân sminuît a fuart la impuantance e il rûl dal furlan, puartant a une grande riduzion dal ûs de lenghe inte nestre region. La azion si è rinfuarçade inte seconde metât dal secul stât. In chel periodi, e je passade in maniere definitive la idee che il furlan al fos une lenghe marginâl e inutile e, di consecuence, al è stât relegât ae rappresentazion di une tradizion di eliminâ. Fin tal 1996 no je stade inviade nissune strategie “alternative” che e podèr rappresentâ un cuintrialtâr zovevul aes politichis di assimilazion patidis dal furlan. Cumò si à di tornâ a partì par fâ di mût che il furlan al sedi tratât, pardabon, tant che une des lenghis de nestre region, cun pâr dirits e oportunitâtis.

Parcè vuê, intun mont une vore svelt e globalizât, si varessial di imparâ e di fevelâ il furlan?

E je la lenghe de nestre identitât milenarie. Al pâr strani che intai agns des “filieris curitis”, dal “chilometri 0”, dal teritori declinât in ogni so aspet (promozional, turistic, agroalimentâr, economic, e.v.i), la lenghe dal teritori no vegni valorizade tant che prin element. Plui che un sempliç codiç linguistic, al è un stîl di vite, al è il mût plui vêr di esprimi ae proprie comunità i valôrs plui profonts. Fevelant par furlan si sintisi plui vîfs, plui atîfs e o confidi che chest moment di cussience e di valorizazion al sedi daûr de puarte: e je in sfese, e al baste pôc par spalancâle.

Ise une utilitât tal imparâ e tal fevelâ par furlan, vuê?

No dome al è util, ma al è fondamentâl esprimisi par furlan. Doprà la nestre lenghe nus covente, prin di dut, par capî cui che o sin. Se no lu capìn, no sin nanceje in stât di comunicâ ben la nestre identitât. Intun mont cussi complès, che ti strice, no si pues dome jessi sogjets passifs che a assorbissin in maniere esclusive e acritiche ce che al ven proponût dal esterni. Si à di jessi e/o deventâ part de modernitât, ma cence uniformâs: al covente scambiâ alc, dâ alc di propri, di origjinâl, stant che o sin unics. Für di chi, o respiri un interès fuart bande il Friûl e la nestre lenghe: cui che a ‘nt sint fevelâ, al è inmagât dal desideri di cognossi miôr nô e la nestre tiere. Mi ripet, ma al vâl la pene: o vin di jessi in stât di proponi, cun grande braûre, la nestre identitât milenarie.

Ce rûl aie vût e aie inmò, inte sô vite, la lenghe furlane?

E je la mêm lenghe mari, duncje e à un rûl “normâl” e cuotidian fin di cuant che o jeri tant picinin. Cussi come che al è normâl respirâ, par me al è normâl fevelâ par furlan. Po dopo, di fantat, o ai cjapât cussience de impuantance dal esprimimi par furlan (no simpri si rindisi cont di cetant che al sedi fondamentâl respirâ se si lu fâs tant che un sempliç at mecanic...).

Cemût dismovi l'interès dai millennials par cheste lenghe?

I fantats dal 2000 a dimostrin un grant interès, net di prejudizis, pes potenzialitâts espressivis dal furlan. Cualchi volte però a son discjolts di messaçs ricorints su lis rêts social che a proponin il furlan - intindût sedi tant che lenghe che tant che persone - daûr canui stereotipâts, cualchi volte pôc dignitôs. O crôt che al sedi compit nestri jessi plui atents intal costruî e intal proponi strumenti adats a completâ la lôr identitât personal e culturâl. Su chest teme, e su cualchi altri che al tocje la politiche linguistiche regionâl, o calcoli che al sedi util valorizâ lis



Eros Cisilino, president de ARLeF

osservazions esprimudis di varis esperts, intai agns plui resints. Tant, duncje, al è stât za dit e scrit, cumò si trate di passâ in maniere plui decise des peraulis ai fats.

Aial za vût i prins contats cu la Agjenzie e cul Consei? Cualis sono stadiis lis sôs primis impressions?

Sì, e o ai cjatât un clime positif, cun personis une vore disponibilis che a vivin il lôr lavôr tant che une mission. Ognidune di chesis si impegne di là dai compits assegnaâts dentri dal propri ambit operatiâl, cun tante passion e capacitatâ. O crôt duncje che a sedin dutis lis premessis par podê contâ suntune buine scuadre e par lavorâ insieme par rivâ a risultâts otims.

Staijal pensant ai prins pas di fâ tant che president? Cuâl isal, secont lui, il pont necessari di partence?

O crôt che a coventin rinfuarçadis lis azions indreçadis aes gjenerazions zovinîs. Inte prime fase de vite o sin personis viertis, cence preconcets, e duncje tant ricetif. E al è in cheste fase che al è impuantant madressi la convinzion che jessi furlans e fevelâ par furlan nol vûl di jessi cuintri di nissun: no je une cuistion di jessi di part, ma di semplice cussience identitarie. Di bande nestre, o pensi che si varâ di lavorâ par implementâ i strumenti dal dialic tra i zovins, ancje doprant lis gnovis oportunitâtis metudis a disposizion dai social media. Dut par cirî, ae fin di un percors, di no meti in vore azions di semplice visibilitât, o indreçadis dome a insiemis limitâtis di utents, ma par provâ a rivâ a risultâts concrets su grande scjale.